



-Pamebhamε

"Nimlɔv : 35 "Su : -Glog ɔn -Kwe : 2010 "Su -bha 'sëedhe -mü "Gwëetaawo

'WɔN -TAɔNG -MA 'GÜ 'SËEDHE

Me -dewo -yö -së

'Me "dhü = në "yɔn -kë ö -dega -bha pë -bha, 'yö- "dhia -yö gun 'ma- me -kpea -nu 'gü. -A suu -mü kwa -de -wo bha- 'ka. 'Bha- -wɔn 'kun "gbu-, 'yö -a = bhlëë 'dhö -kë me "wee -nu 'wo to, -a nu wëëdhö. -A -wɔn 'gü, kö kwa -de -wo bha, -a -ya -sü waa- -wo pö -sü bha, -kwa- -nu -wɔn 'kun "gbu-. -Kwa kwa -de nu -a -nu draan- -sü -dhe. -Kwa kwa 'ko -nu faan do -a -nu draan- -sü -bha -dedewo.

Kwaa- =danwo pö "se 'gü -wɔn

-Kwaa "yuvbha! -Kwaa "yuvbha!



'Me 'ö 'ka yö 'wɔn -së = ya kë ü -dhe, -a "yuv = në 'ö me -ya sü. 'Wɔn -së 'ö "dhü bha -yö -kë "Gwëetaa -me -nu kwa -dhe 'gbaandhö. -Kwaa 'në = ple = në 'ö 'wo = wa 'sëedhe 'kpii- -dede = slɔɔ. = Klang 'ö 'wo- -kë bha, -wo kë -dho 'ö 'wo- go do ö do -dhe 'gü. -A 'në -bleesü -yö ö -bha gizame pase "su 'ö -kë -gblɔdhee 'ka 'ö "kwi -zë 'ö ö bha -dhe 'me- bha, -a -bha -dhekpɔyi -kaɔngdo ö ga "saaga (18) 'ka 'Biya. 'Në bha -wa -dhe = Göö- "gblëë- Flannsisü 'yö go = GööwLöö. -A -bha yë 'ö yöö- kë bha, yö -mü = klang- "gblüglbü -nu 'ö 'wo niveesite bha, -a -nu draan- -sü 'ka. -A 'në = plee -naa bha, -wa -dhe Bleedë Edhikö. -A dë = në 'ö -kë dotëë Bleedë 'ö go 'Sangtaa 'ö- -bha = dhɔtrɔɔ -kɔ 'ö "Maadhö bha- 'ka. Edhikö 'ö 'sëedhe 'kpii- = slɔɔ bha, = ya kë = dhɔtrɔɔ "mlümlüsü = në 'ka = taa yö- -bha. = Dhɔtrɔɔ -nu 'ö 'wo me -nu -pe "iin wopeedhe bha = ya kë -a me do 'ka. -Yö -kë 'ka "su 'dhe 'ö -kë "plee 'ka 'ö 'wo- -dhe 'zuen- "kwi -wo 'gü bha, -a -bha -dhekpɔyi "suesiö (9) 'ka 'Biya. = Ya kë "dhü kö 'wɔn 'ö 'kwa- "yusü kö yö = në 'ö bha.

-Kwaa "Kodivua -se 'gü -wɔn

Dha -bha me -kaɔngdo ö ga do (11) 'ö- zë "su 'ö -ziö ya- gü



-A 'dhe 'ö -kë dha -bha me zë -kɔ 'ö- -bha 'dodo, dha = në me zë, -Dhe -nu 'ö 'kwa "wɪ -naa 'ka -sü 'ka bha 'wɔn yaa -dede -mü. 'kɔ = në = weng me -nu -ta. -A bha, -wo -ya -sü 'ka goo 'gü 'Yaa "se 'to dhi -wɔn 'ka. Kwaa- 'dhe 'ö -kwe ya- 'ka ya, -a -gii -yö -dhe -nu = në- 'gü. = Ya kë 'pö "Kodivuaa -se 'ö 'waa = mɔɔ- kë -gbaɔn "kweanng- -dhe 'ö 'wo "dhü dha ban -kɔ yaa -ya kë -bha kö -wa -zɔn kwaa- metii -kë **Wiliamö** -dhe 'ka, 'ö bun bhoo, 'yö goo bha -a "pëen 'bha "se -nu 'ö 'wo 'yënnng- -pö -zian = taa -dhe 'kpii- 'dhö -bha 'Biya -nu = wa = gbloo 'yö = wa -pö 'ka ya, -a -nu 'ka, -a -bha -sëdhe -dhe -to "dhü -sü 'gü bha, -a 'dhö, me -nu -ta. "Bin 'ma -dhekpɔ -wɔn 'gü bha "we -kwe ya bho -a 'dhe 'ö 'wo- -dhe **Gobele**, -a -wa -pö 'me -nu 'ö 'wo mü bha -nu -ta.

-nu -dhe -wo go bha "kɛɛ 'waa -dhekpaɔyi -kaɔng =ple ö ga bha- -nu 'gü bha, kö -kaa -nu -ta
 "wɪ- -bha tongtongdhö. -Wa -pö -yiisiö (24) bha dha -yö me 'kun kö -wo 'go -dhe -nu bha-
 wo 'dho -dhe 'bha 'yaa 'dhö. -kaɔngdo ö ga do (11) =në- -nu -nu 'gü.
 -Kwɛ 'dhe 'ö kwɛɛ ya, "su 'ö -kë zë. =Ya kë "dhü kö 'mɛ -nu 'ö -kë
 "plɛɛ ('zuen-) 'ka bha, -a -bha =dhe kaa- me -nu -wo -dhe -nu

-Ziö me -nu -bha dhe "iin gɔɔn- =keng -sü 'yaa -së: -ka me "bin ya -ga




'Wɔn 'ö ya -yö -kë "dhü "su 'ö -kë -gblɔdhe ('Me-) 'ka -a -bha
 -dhekpaɔyi -kaɔngdo ö ga "suesiö (19) 'ka Kpanngbasu
 Yaamusokro 'pɛɛn 'ka. 'Nëglɔɔnnë 'ö 'wii 'kë -a wëédhe -zɔn ya, -a
 -kwe =ya =mɔɔ 20 -bha "kɛɛ -a -bha dhebë -wɔn 'yaa wɔn din
 'ka. -Yö -kë mü =dhe 'yö- -bha gɔɔndhega 'yaa 'wɪ- -bha kö -yö
 'dho "sɪaa-?
 'Dho =në 'ö 'wo- wo -a dhe -gɔ 'pödhö Boliko Didievi "kubhu 'gü
 ga "saa- kë -dhe 'gü, 'yö -ziö me -nu -bha dhebë =keng- gbeng. 'Ö
 ö bo -wɔ dhebë bha- 'ka -sü 'ka -a -bha gɔɔndhega 'yii 'dho "sɪaa-
 tongtongdhö.
 'Me 'ö 'ka -ka 'wɔn -zɔn 'ka 'sü 'mɛ 'ö- =fotoo 'ö ya- -bha. -Ya -zɔn
 =dhe -ziö me -nu -bha dhe =keng- -sü bha 'yaa -së tongtongdhö.
 -Kwaa -dhioo dɔ kwa 'ko -nu -ta.

'Wɔn 'ö -gban "Kpungtaadhe -wɔn -bha

=Bhadhong -bha -siö 'ö- wo metii "se -nu kwa -go



Me =gban kwa- -wɔn -dɔ =dhe =badhong 'kpɪi- -yö -kwe ya- 'ka. Metii "se
 "saɔdo (6) =në 'ö 'wo kë dho- -bha "kwi -nu kpö 'gü. Wo -mü Niziödhia
 (=Nanggo -nu -bha "se), 'gü bha. -Yö -gun 'nu kwa "piü -dhekpaɔyi =ple (2) 'ka. 'Wo
 Alöziödhia (metii "se -mü "kɛɛ =dhe 'kupö bha -yö 'to metii -nu =loo -naa 'ö- -ta bha,
 "se 'ö -a 'gü -me -nu kwi 'ö kwaa- "se ya- 'gü, "kɛɛ -a -zuö 'ö Kamödhunö -yö kë -loo mü
 "puu -yö -mü. Metii "se -nu 'ö wo bha, "se "saɔdo bha, -a -kwe 1990 'ka. Senegalö -yö
 'wo "dhuü- =yën bha, -a do doseng =në 'ö kë dho 'në 'bha kë -loo mü
 -mü), Dhaflikö di 'Siidö (metii wo "dhiü. Yö -mü Gaana 'ka. -kwe 2002 'ka. -Dhe 'ö- -nu
 "se -nu 'ö 'wo "sɪaa- =yën bha =gban 'wo =loo- -bha bha,
 -a do -mü), Kamödhunö, Gaana gun =ya 'to =ple -a -nu -gɔ kö -wa -dhe "kwi -wo 'gü 'kaa- dö
 waa- "Kodivuaa 'ka. 'Ö 'wo- pö -wo 'kupë bha- 'sü, "kɛɛ 'eke! finalë.
 "kpungtaadhe =ya bhɔ, Gaana -nu -kɔ 'yii kë =mɔɔ- =Ya kë "dhü kö metii -nu kwa
 =badhong suu 'ö "dhü bha, -a -bha. -Wo kë- -nu -gɔ -kë "su 'ö -kɔ =ya 'wɔn 'dhe 'ö kwɛɛ bha-
 -blesü =në 'ö -zuö -naa metii -kë "plɛɛ ('zuen-) 'ka, -a 'gü =në wo bha
 "se 'gü, "kɛɛ Dhaflikö di 'Siidö




=Fotoo 'ö ka "yan 'dhö- -bha bha, 'në do =në 'ö-
=fotoo 'dhö bha. -Wa -dhe Kumaa Pasiwan. Enngdieng
'në -mü "këë 'peng- -mü. -A "tëedo -gə ga -ya 'gu 'gü
'yö- "gban -kpaä 'dhö "kpenng. -Kaa -ga -së 'ka. 'Në bha
-yö dhiang -zë. -Ya -pö 'yaa ö "piü =dhe me -nu -wo ö
-ga -kə yaa kë =dhe -kə 'ö 'wo- kë sië 'ka bha- 'dhö. -A
dë -ya -dhe me -nu -gə kö -wo ö -ta 'kun kö -a gbö
"Kumaa bha -yö "pë "iin -yö -yö wo peedhe.

Me =sləw -pë -nu -wən

'Wëë- -yö =tanmatii 'gü -dedewo =dëë

'Wən 'ö -gban =tanmatii -bha bha, -kwaä 'gü ma -së 'ka. 'Ö -blesü kwa -
gə 'pö- -nu 'gü, =tanmatii -nu 'ö 'kwa- ta kwa -gə 'bhlaa- -nu 'gü bha,
"kadhi do, 'bha- -bha =tanmatii bho, 'yaa ziö 'təngdhö -yiisiö (4) -ta.
"Këë kö -a 'dhe 'ö- "bin 'dhö 'sëëdhe -ta ya, kö 'ü- -ke kë, -a -ke kë -kə -ta
-së -dede 'ka, -a "kadhi do -yö -kë 'təng- -kaəng "suesiö (90) waa-
'təngdhö këngdo ö -kə =plë (120) =zinng 'gü. =Ya kë "dhöodödhë
"gblügbliü -nu 'gü, -a "kidhung do sönng -yö 'wëë- "kaəng "səodhu (250)
waa- -kaəng "səodo (300) =zinng 'gü. -Wa =tanmatii suu -dëë bha, -a
-ta mü =dhe? 'Waa -a ta "siaa- "se ga -dede -bha. Kwa -məw -a -bha 'ö
'kwa "kɪsv -nu -pëkë "dhü "pen -nu 'ka, 'kwa "së =loo- -nu 'gü, 'kwa
=tanmatii ta- -ta. =Ya kë "dhü 'yö "yua -nu 'wo "seedhö bha 'waa -a
-bhong -nu zë. 'Kwa- pö kwaä- ta 'zü "se -dede -ta, kö kwa -məw -bha 'ö
'kwa- -nu ta kwaä- "kaflu, =kakao waa- -dhöö -bhlaa -nu, "këë -a -bhlaa
-dëë -nu -bhiëë ga -nu =zinng 'gü. -Kwaä 'gü ma -së 'ka. 'Bhlaadhe -nu 'ö
'wo "dhü bha 'wa 'dho kë 'bhlaadhe zizi -nu 'ka. =Tanmatii suu -dëë bha,
'bha- -ya -plang -ta, -a -dhe =kpaoyi -kaəng do -naa bha, 'yö 'wo- ta-
"kɪsv -nu 'ö "dhü bha- -nu 'gü. "Su =plë "piü kö- -nu bhe =ya kë -së
-dedewo. =Tanmatii bha 'waa- ta "yi "dhiü, =ya kë "dhü "yua 'ö go "yi
=bhaa -ya -see.

"Yi 'ö 'kwa dho =weng- -ta bha,
-yö kë -kləng "yi 'ka, "këë -kləng 'ö-
-bha =gblëen -dhe 'ö 'metrë -yaaga
(3) 'ka =në -a "yi 'ka. "Yi bha
=bedhe -yö =weng sië -a =bhaa.
Dhiang -nu 'ö 'wo -gban =tanmatii
bha- -bha -yö -zë "dhü 'plëë ('zuen-)
-dhekpaoyi -kaəng =plë ö ga =plë
(22) 'ka -kwe ya- 'gü. Ka -məw -a
-bha 'ö 'ka Emanieë Akani dhea"
kpə. -A -bha 'dree- -sü =ne:
eakani@nouveaucourrier.com



'Wən 'ö -gban -potaasü -wən -bha

'Yən "puu waa- nvnv: -kpə paa- =bedhe

Kö -wo pë -da 'ü -gɔ pëbhee "piü 'bha- -bhö 'ö ü kē siē, -bhö "kwi -a "dhudhu 'ö 'yaa "neeneē -a 'sü
kö 'ü waa- "yon "puu kaan- "kwëë 'ü- mü. 'Bha bo- -kē "dhü -sü 'ka ü -dho -pe -kpɔ paa bha 'ka 'ö
-kē ü dha -sü 'ka.

'Wən 'ö -gban troo -nu -bha mɛ wəkɔ -nu 'gü

-Ka -ya 'gü -gbloo waa- "dhü do =fotoo ya- -nu -ga -së 'ka



-Gbloo 'ö mɛ =kwaa 'gü bha, metii -dede =në
'ö- -pëkë. 'Bha- -ga -yö -kë =dhe 'pë 'ö 'wo-
-pëkë biö "song 'ka 'dhö. 'Bha- -ga 'zü -yö
-bhö gbaɔ -bha. -Gbloo bha ka- -ga "dhü "kee
-wa ya- 'gü, mɛ -dhe 'bhaa 'to -neesü
tongtongdhö.
"Dhü 'ö do bha 'pö, "dhü -dede 'ö bhö 'ö- kwëë"
-nu 'wo -ziö 'ko -ta yö -mü.

"Gwënnɔ

«'Mɛ 'ö 'gben- kun -së 'yö 'gben- 'dhö ö wengga 'gü zë- -bha.»

Mɛ 'kənwən

Mɛ 'kən -wən -dede: =foto -dede 'ö 'ka "yan 'dhö- -bha ya 'ka- yö -së 'ka
-ee?

-Ka gɔ 'në seennë -ga -dedewo 'ö mɛ -nu 'wo- zë 'wëëga -wən -dhe 'ö 'wo
=kwëë dhu -a -ta ya. 'Pë 'ö -ya kē 'ö "kwi -nu "yan 'dhö -ziö -nu wo kwa
'gü, "iin 'ö 'wo kwa sü =dhe wü -dede 'dhö bha, -a 'bha -nu -ga bha.
=Ya kē =tɔn =dhe bhiëëga 'ö mɛ 'bha -nu 'wo- -dhe bhüü" ga 'ö 'wo
=kwëë- -lö 'ka ya =ya "kan =tɔn, kö 'mɛ -nu 'ö 'wo "dhuüü- bha 'wii ga
=në wo bha -ee?

-Kwa dhiang zë kwaa- mɛ -nu -dhe. Mɛbhudhe 'yaa 'dhö 'zü.



Pë -Wlangda -sü =Bheekɔ =bhaazëmɛ -bha =bhaa -dhə yöö kē

"Su 'ö -kë "zɛ 'ka 'ö "kwi 'dhö- -dhe 'Utö bha, -a -bha -dhekpaɔyi "sɔɔdhu (5) bha, =Bheekɔ
Dhifɔnngsü 'ö -kë =Bheekɔ =bhaazëmɛ 'ö gun 'Sangtaa -a gbö 'ka bha, yöö ö dë -a =bhaa -dhəkë
'ka 'Sangtaa -dhe yaan- -bha. 'Mɛ "ʋ 'mɛ 'ö kaa- 'wən -ma, -ka nu. Dhifɔnngsü -ya -pö 'ka nu.

'Ka ka bo 'sëëdhe ya- -wo pö -sü 'ka, 'wən 'bha =ya kē ka -gɔ kö 'ka pö yi -dhe, -ka 'sëëdhe kē kö
'ka bo. Yii- 'dresü -mü 08 BP 857 Abidjan 08 'ka. Tel. 08 18 08 88 / 45 01 93 36 ou 02 34 71 20

'Mɛ -nu 'ö 'wo 'sëëdhe 'ö ya- -kë, wo -mü =Sai Zoziäsü, "Dhɔɔgbö Zafe, =Kest Məyan Dhifɔnngsü,
Valangten Vidrinö waa- Edhena Pɛdhekwalösökaya 'ö- -nu =gban =plɛ 'wo go Dhusi 'ö -da "Anesü
'ö go 'Suisü , -a -nu 'ka.